



Die Aabrennte FASNACHT 2024

Dr Fritzli, dä het ufgruumt und an d Franziwörtli dänggt,
D Mamme het im drum e Bachmaa-Schoggiweggli gschänggt.
Nur mängmol isch dä Bueb au fräch und macht im Zimmer Krach,
Denn heisst "Du Saugooof, mir göön jetzt zur Stroof zum Läderach."

Suechsch e Job oder e Woonig, denn isch s oft esoo,
Heissisch Babić oder Grgić denn kasch wieder goo,
Mir sinn empört und hoffe seer, dass' nüm so wytergoot,
Denn wird villicht in Zuekunft au e Jositsch Bundesroot.

Gschreggti Bei, e Fuscht, e Gneu wo voll in d Eier goot,
Dr Xhaka seet im Zweikampf als scho vor dr Karte Root.
Dä het Talänt als Pädagog, es bruucht die Lüt vom Fach,
Me suecht sy händeringend - in dr Schuel vom Läderach.

Zum letschte Mol sin mir ins Kiechli, hänn ys nit loo nää,
Drääne salze s Popcorn, uf de Plätz siibe bis zää.
Grossi Draame mit vyl Schmäz hänn mir am liebschte gsee,
Jänu, zum Hyyle göön mer jetze halt zum FCB.

Ob Atici, ob Thiriet, Cramer z letscht am Änd?
Si danze Ringelreihe ums Presidialdepartemänt.
Alles frogt sich, wär am Schluss sich denn ins Amt verirrt,
Uns ischs Wurscht, solang dr Preesi nit dr Dääge wird.

Es beschwert e Schildgrott sich und krächzt durchs Zollidoor,
"Jetzt leischt ich gueti Diensch fürs Volk, sit hunderfufzig Joor.
E jede Daag biet ich mi Show, blyyb nie im Panzer drin,
Und alles won i grieg, isch so ne doofe Kupferpin."

Mir gniesse Wurschtsalat garniert in ere Basler Beiz,
Mir dringge Bier und spüüre in dr Bloose bald e Reiz.
D Stäagen aabe, schiffe, schüttle, spiele ganz in Rue,
Und wo mir uffekömme isch - herrjee - au die Beiz zue.

Zum Glügg finde mir no e zweiti Beiz wo offe het,
Dört schlemme mir vier Cordon-bleu frittiert im Gänsefett.
Bim Heimwäg denn ins Gundeli schiggd d Schmiir uns wiider zrug.
Me loot ys wäg em Übergwicht nit uf d Margretebrugg.

E Fründ vo uns, är isch e Schwoob, meint zuen ys, dasch kei Witz,
"Singt ein Lied zur Tütsche Baan, das haut d Lüt vo de Sitz."
Doch das isch uns z vyl Risiko, do mache mir nit mit,
Well bim ne Baan-Väärs weisch nie, ob dä aakunnt oder nit.

Wäg Schmäz isch d Viola gescht zum Zaanarzt Doggder Bloch,
Dä findet rächts im Baggezaan e riisegrosses Loch.
„Das ligt an dr Ernäärig“, het dr Doggder konschtatiert.
Sy heig in letschter Zyt bestimmt, z vyl Süessli konsumiert.

Feu Sacré

www.aabrennte.com